



75

CURRICULUM STUDIORUM SCHOLÆ
GORLICENSIS,

conscriptum à Clariss.º Viro

Dn. M. LAURENTIO LUDOVICO
Leobergense, Rectore.

A.º 1584. Cal. Vmbr. & præsentì
Statui accommodatum.

Diebus Dominicis, horis matutinis.

Selectæ quatuor superiorum classium decuriæ, per vices ob-
eunt preces matutinas. Sub concione dimittuntur. Post concio-
nem in suum reversi curiales locum, quod reliquum est hymnorum
decantant.

Ad liturgiam sacram superiorum trium classium decuriæ omnes
præstò sunt; musicæ modulis concentibusq; operam navant. Sub con-
cione, in templo universæ, præsentibus præceptoribus, iisdemq; in-
spectoribus suo loco detinentur. A concione, quæ restant sacra, per-
aguntur.

Reliquæ tres classes inferiores, in Schola conveniunt; atq; ibi ceu
infantes in cunis Scholæ adhuc vagientes, præeuntibus voce præcepto-
ribus, recitant preces pueriles, Capita doctrinæ Christianæ, Cateche-
sin Lutheri, Evangelia lingua vernacula, sacras sententias è Rosario
Trocedorfii. Operam navant alternis

Johann. Major Gorlic.

Paulus Gebhardus Gorlic.

Joach. Feurbachius Gorlic.

Cantus & Symphonias in templo moderatur

Joach. Sannovius Mönchberg. March.

PRIMA

PRIMA CLASSE.

Diebus Lunæ & Martis.

Horis Matutinis.

Qui apud præceptores vivunt: illi primùm singulis diebus privatim sacra faciunt: deinde ad publicas lectiones sese accingunt, & publicæ recitationis prius privatum specimen edunt.

Post publicos hymnorum sacrorum concentus, in singulis classibus initium fit à precibus Scholasticis, recitatione catecheseos, aut lectionis, quæ in sacris proposita est: lectione Psalmi & capitis ex Bibliis. Has recitationes sequuntur operæ horarum.

Prima, quæ est *Septima matutina*, Dialectica Philippi. Certis partibus absolutis, iisdem horis instituuntur repetitiones præceptionum: quas sequuntur recitationes ex Compendio Dialectices Scholæ nostræ.

M. Elias Cüchler Gorl.

Secunda, quæ est *Octava Matutina*. Libri Ciceronis de Oratore primum vernacula lingua redduntur: postea Dialecticis & Rhetoricis præceptis accommodantur: Grammaticæ commonefactiones, ubi res postulat, adduntur: phrasium loci communes & periodorum membra ex præscripto Dn. Sturmii monstrantur. Alternis lectiones & Grammaticæ repetitiones. Absolutâ disputatione integrâ recitationes: in quibus concertantes inter se de palmâ committuntur.

M. Joh. Ludovicus Gorl.

Horâ nonâ privatis apud præceptores locus est repetitionibus omnium ordinum.

Horis Pomeridianis.

Duodecima, privatis tribuitur repetitionibus apud præceptores domesticos & pædagogos.

Prima. Phocylides, cui succedet oratio Isocratis ad Nicoclem. Eam excipiet liber unus Homeri. Usitata enim fuit nobis hæcenus *ἀντιδοσις* seu vicissitudo orationum Isocratis & poëtarum, Homeri, Hesiodi, Pythagoræ, Phocylidæ, Theognidis. Hic primùm interpretatio latina proponitur: deinde singularum vocum examen Grammaticum additur: dialectorum discrimen monstratur: themata singuli scribere domi, in ordinem suum redigere, atq; ad repetitiones publicas afferre jubentur. Interdum distichon aut tetrastichon, interdum periodum Græcam grandiores exhibent.

M. Georgius Theodorus, Gorl.

L

Secunda.

CURRICULUM STUDIORUM

Secunda. Arithmetica Gemmæ Frisii; cui succedent præparatis mediocri arithmetices usu, auditorib. quæstiones doctrinæ Sphæricæ.

M. Martinus Möller Sprottanus.

Tertia. Æneis Virgiliana, in quâ primum Grammaticus vocum ordo monstratur: postea vernacula interpretatio adhibetur: phrasium poëticarum loci monstrantur: tandem dispositiunculis Rhetoricis partes Poëmatis illustrantur. Uno libro absoluto succedet liber Poëticorum Vidæ. Alternis lectiones & Grammaticæ repetitiones præceptionum Philippi & præcipuarum observationum Linacri.

M. Elias Cüchler.

Diebus Mercurii & Veneris.

Prima. Oratio pro Milone. Hic primum vernaculâ linguâ traditur expositio: eam periodorum & membrorû ex præscripto Dn. Sturmii sequitur distinctio, Rhetorica dispositio, examen elocutionis oratoricæ, loci communes phrasium: & Grammatica necessariarum vocum explicatio. Alternis lectiones & Grammaticæ repetitiones. Absolutis integris partibus recitationes. Totâ finitâ oratione in medium procedunt, vi memoriæ, pronunciationis atq; actionis conformatione inter se certantes: sententiam de victoribus ferente in præsentia præceptorum, Prætoris & Senatus Scholastici. Huic succedet liber Epist. Ciceronis. Ubi res postulat, audiuntur rei dicentes causam neglecti officii in foro scholastico: exercente iudicium Senatus Scholastici prætoris. Proponuntur eadem horâ Rhetoricæ dispositiones, declamandi munus suffragiis Senatus Scholastici, tertio decimo post die, subituris. Declamationum argumenta è doctrinâ scholæ publicâ sumuntur, adolescentibus nota: aut è trecentis à Melanthonè scriptis orationibus deliguntur: quibus sapientiæ & eloquentiæ palmam hac ætate tribuunt eruditi: ut ad earum lectionem adolescentes maturè invitentur.

M. Elias Cüchler.

Secunda. Rhetorica Philippi, ubi communia Rhetorum præcepta monstrantur: dispositionum typi varii ex autoribus optimis proponuntur: de regulis studiorum adolescentiæ, quæ ab autore in hoc libello ad usum nostræ ætatis traduntur, discentes diligenter erudiuntur: optima quæq; una cum præceptionum serie à singulis memoriæ mandantur ex libello Scholæ nostræ. Locus de Imitatione ab omnibus ad verbum exigitur.

M. Johan. Ludovicus.

Horis

Horis pomeridianis.

Prima. Grammatica Crusii Græca. Alternis lectiones & recitationes. Integro absoluto loco repetitiones & examina universalia.

M. Georg. Theodorus.

Secunda. Libri Ciceronis de Officiis. His succedent commentarii Cæsaris. Alternis lectiones & Grammaticæ ex præscripto Melanthonis & Linacri repetitiones.

M. Mart. Möller.

Tertia. Parænesis Isocratis ad Demonicum. Primùm vernacula interpretatio καὶ ῥήματα proponitur: deinde singularum vocum Grammatica excutitur: dialecti Atticæ proprietates ostenduntur: thematum idem quod supra examen exigitur. Proponuntur imitationes. Quidam hujus linguæ studiosi integras orationes aut poemata Græcè scripta in publicis scriptorum examinationibus afferunt. Absolutâ intra paucas septimanas Parænesi, succedet Ajax Sophoclis.

M. Johannes Ludovicus.

Die Jovis.

Prima. Alternis disputationes & Declamationes. Declamatores bini, Prætoris præfatiunculâ invitati de palmâ elocutionis & actionis certant æmulatione quadam honestâ & liberali: censuram modestè agunt Prætor & Senatus Scholasticus, præsentè Rectore.

Disputationes consumuntur partim examine exemplorum in toto organo Philippi: partim objectionibus ad theses & sententias illustres, è lectionibus publicis collectis, & ad disputandû propositis. Harum solutiones, vel ex ipso textu, vel enarratiunculis brevibus, ut occasionem repetendarum habeant lectionum, depromunt adolescentes: easq; ad examen syllogisticum de præscripto Melanthonis, tum opponendo tum respondendo accommodant. Præses disputationum suffragiis Senatus Scholastici legitur. Respondendi munere, ut & declamandi, funguntur duæ decuriæ supremæ. Reliquæ ordine oppositæ, à præside ad normas examinis Syllogistici adiguntur. Horum conatus audit præfens

M. Elias Cüchler.

Secunda hora matutina. Examen scriptorum oratione soluta: quæ quadratio ante proposita fuerunt, ad imitationem librorum de Oratore, de Officiis, orationum aut Epistolarum Ciceronis, ex præscripto Dn. Sturmii. Interdum aliæ quædam narrationes necessariæ interponuntur. Qui bonam navârunt operam: hi publicè sua recitare scri-

pta jubentur: ut alii horum exemplo ad diligentiam invitentur. Huic examini præfunt:

M. Elias Cüchler. *M. Joh. Ludovicus.*
M. Mart. Möller. *M. Georg. Theodorus.*

Feriis anniversariis, Theophaniis, Hilaribus, Soteriis, Paschali-
 bus, Pentecostes, Liberalibus Scholasticis, quibus plures à studiis im-
 munes sunt dies, singuli suo Marte invenire, disponere, elocutione or-
 nare jubentur scripta de doctrinâ illius temporis, ut hac occasione in-
 vitentur ad lectionem, meditationem, atq; exercitationem doctrinæ,
 quæ publicè in Ecclesiâ tractatur. Quorum scripta probantur, ea pu-
 blicè in Scholâ audiuntur.

Horis Pomeridianis.

Immunitas à studiis totius populi scholastici: Inferiores tamen
 decuriæ hujus Classis à 12. usq; ad primam privata declamationum ex-
 ercitia habent: quibus paulatim ad dicendi usum assuefiant. Horum
 conatibus præest Prætor Scholasticus cum iudicibus ex hac classe sele-
 ctis. Auditorum certus numerus manè à prætore accersitur.

Die Saturni.

Prima. Grammaticam expositionem, dispositionem Rhetoricâ
 Evangeliorum Dominicalium: post etiam theses, objectiones & solu-
 tiones breves atq; dialecticas è postillâ Phil. Melanthonis proponet

M. Johannes Ludovicus.

Sub finem hujus horæ conferunt inter se præceptores de lectioni-
 bus, repetitionibus, progressionibus discipulorum, de absentibus, de pe-
 tulantibus, de diariis, de scriptis publicis, de disciplinâ, de officiis in-
 ter se mutuis, de communicatione operarum in docendo.

Secunda hora matutina. Examen scriptorum in oratione ligatâ,
 quorum argumenta vel ad imitationem lectionum publicarum in Vir-
 gilio accommodantur: vel è poëtis nobilioribus, qui poësi Christianæ
 hac nostra ætate colophona imposuisse, non immeritò putantur, dispo-
 sitiones numeris aptæ, versuum sententiis distinctæ, & à phrasi poëticâ
 non longè remotæ, accurato studio proponuntur: ut adolescentulorû
 conatus aliquâ ex parte, hac ratione subleventur. Si qui diligentius sua
 elaborârunt poëmata: illi publicè audiuntur. Hoc examen curant

M. Elias Cüchler. *M. Joh. Ludovicus.*

M. Martinus Möller.

Hora tertia, quæ est nona. Epistola Pauli ad Romanos Græca:
 primùm additur interpretatio genuina latina: deinde ostenditur me-
 thodica

thodica analysis, post doctrinæ genus explicatur: tandem accedit Grammatica Phrasis Paulinæ declaratio. Absolutum caput grandiores græcè, minores latinè memoriter recitant. Huic succedit Epistola ad Titum, quam subsequenter Confessio Augustana, Examen Theologicum Philippi: & Grammatica Græcæ Catecheseos repetitio: qui fuit harum lectionum quinquaginta hisce annis, quibus Gymnasium hoc floruit, ordo.

M. Elias Cüchler,

Horis pomeridianis.

Preces vespertinæ ab universo cœtu scholastico, tam minorum quam majorum gentium, frequentantur.

Hi primi census cives, ad studia Academica, si quam debent, adhibent in discendo diligentiam, afferre possunt elementa præcipuorum articulorum doctrinæ cælestis, è scriptis Lutheri & Philippi: noticiam necessariam præceptionum grammaticarum, dialecticarum, rhetoricarum Philippi: exempla memoria mandata aliquot orationum Ciceronis tum forensium tum Philosophicarum: quæ, ut ipse Cicero loquitur, æquabili scripta sunt & temperato orationis genere: Item insignium aliquot Epistolarum & narrationum Ciceronis: librorum etiam aliquot Virgilii & Cæsaris: usum mediocrem styli in oratione solutâ & ligatâ: nonnullam disputatiuncularum & declamationum peritiâ: elementa Græcæ lingvæ studiis Academicis imprimis necessaria: aliquam cognitionem Arithmetica, Musica, principiorum sphericorum: denique non prorsus rudes erunt Poëtarum & Oratorum Græcorum.

CLASSE SECUNDA.

Diebus Lunæ & Martis.

Horis Matutinis.

Prima. Etymologia Grammatices, è locupletioribus Philippi præceptionibus: in qua & præcepta & exempla breviter exponuntur, regulis applicantur: historiarum & fabularum, si quæ occurrunt, commemorationes prolixæ prætermittuntur. Alternis lectiones, interpretationes, recitationes, ephemeridum inquisitiones. A prioribus plura, à posterioribus pauciora requiruntur.

Joach. Sannovius Cantor.

L ij

Secunda.

Secunda. Elegiæ Ovidii & Bucolica Virgiliti alternis. In his duodecim circiter versibus propositis, Grammatica vocum constructio monstratur: interpretatio linguæ vernaculæ additur: vocum & phrasium breves enarrationes & distinctiones traduntur. Alternis lectiones & Grammaticæ repetitiones. Ut pueri ad domesticas repetitiones adsuefiant: propositam lectionem domi vertere linguæ vernaculæ coguntur: & in Scholâ præceptori versionem inter repetendum exhibere. Idem fit de examine præcipuarum regularum.

M. Georg. Theodorus.

Horis Pomeridianis.

Prima. Prior pars Grammaticæ Græcæ Crusii cum colloquiis Græcis Posselii. Hic alii in lectione & pronunciatione vocum Græcarum exercentur: alii vocum discrimina & inflexiones meditantur. Unâ aut alterâ sententiâ propositâ, lectiones ac repetitiones locum habent eâdem horâ.

M. Martinus Mollerus.

Secunda. Musica Gesii. Usus præceptionum in harmoniis quotidianus. Interdum hymnus, quem tempus flagitat, è libello Scholæ antè enarratur, quàm harmoniæ proponantur.

Joachimus Sannovius.

Tertia. Epistolæ Ciceronis. Periodorum membra distinguuntur: ordo vocum Grammaticus monstratur: vernaculâ linguâ tres aut quatuor sententiæ redduntur: phrasium loci communes ostenduntur: ut in Ephemerides referantur. Alternis lectiones & Grammaticarum præceptionum Melanthonis repetitiones: diarium inspectiones.

M. Johannes Ludovicus.

Diebus Mercurii & Veneris.

Prima. Syntaxis Philippica auctior. Post vernaculam sententiarum & versuum interpretationem exempla regularum monstrantur, exceptiones & annotationes discernuntur. Hic ut iterum ad domesticas adigantur repetitiones pueri: applicationum exempla domi scribere & præceptori in scholâ offerre jubentur. Alternis lectiones, interpretationes, recitationes, scriptorum domesticorum examina.

Joach. Sannovius.

Secunda. Doctrina de syllabarum temporibus, de numerorû, qui pedes vocantur, generibus: de carminum formis, ex præscripto Dn. Meisteri. Alternis lectiones, interpretationes, recitationes.

M. Georg. Theodorus.

Horis

Horis pomeridianis.

Prima. Paradoxa Ciceronis, quibus propediem succedent Libri Ciceronis de Officiis, in quibus vernaculâ lingvâ quinque vel sex sententiæ proponuntur: constructio Grammatica, ratio distinctionis, vocum ac phrasum vis ac significatio monstratur. Alternis lectiones, repetitiones, recitationes, laborum domesticorum examina.

M. Martinus Möller.

Secunda. Musica Gesii, in qua technica vocabula enarrantur & præceptorum usus in exemplis, in tabulâ propositis monstratur. Exercitationes hîc sunt quotidianæ harmoniarum: quæ diebus sacris in templo per totum annum decantantur.

Joach. Sannovius.

Tertia. Lælius sive de Amicitia Ciceronis: quo absoluto succedit Oratio brevior Ciceronis, qualis est pro M. Marcello, pro Archiâ, pro Dejotaro, Post reditum ad Quirites, item Sexta Verrinâ: in quibus quinque vel sex sententiæ vernaculâ lingvâ exponuntur, phrasum loci monstrantur: & in diaria congeruntur. Alternis lectiones & Grammaticæ repetitiones, Ephemeridû inquisitiones. Ad finem perducto libello aut oratione, instituuntur recitationes: actione decertantes inter se curiales in Scholâ committuntur: diligentia & industria studiorum remissione animicq; recreatione compensatur.

M. Elias Cüchler.

Die Jovis.

Prima. Generalia examina præceptionum Etymologiæ & Syntaxeos. Item elementa doctrinæ Arithmeticæ instillantur huic ordini, alternis

M. Martinus Möller.

Joachimus Sannovius.

Secunda. Examen scriptorum oratione solutâ, quæ è phrasibus Ciceronis in lectionibus quotidianis traditis proponuntur.

Joach. Sannovius.

Valentinus Thebes Gorlic.

Die Saturni.

Horis matutinis.

Prima. Grammaticam & phrasin Græci textus Evangeliorum è prælectionibus Melanthoniis tractat

M. Georgius Theodorus.

CURRICULUM STUDIORUM

Secunda. Examen Philippi. Vernaculæ interpretationi adduntur Grammaticæ de simplicibus capitibus commonefactiones. Alternis lectiones & recitationes.

Joachimus Sannovius.

Tertia. Examen scriptorum oratione ligatâ: in quo posteriores diflocatas in versibus restituant dictiones: ut veluti umbrâ quadâ verificationis, quantitates syllabarum perpendere atq; discernere discant. Priores è phrasibus & sententiis Virgilianis numeris suis vincire proposita conantur argumenta: laborantes in verbis & formulis: quæ in numeros facillè cogi queant.

M. Georgius Theodorus.

Horis Pomeridianis.

Preces Vespertinæ.

Hic ordo ad supremum affert summam locorum doctrinæ ex Philippi examine: mediocrem cognitionem quatuor partium Grammatica Philippi: phrasium Ciceronis, Virgilii apparatus: progressionem nonnullas in exercitiis styli, oratione solutâ & ligatâ: thesaurum memoriæ optimarum sententiarum, periodorum, versuum, è Cicerone, Virgilio, Ovidio: initia Arithmetica, Musica, lingua Græca.

CLASSE TERTIA.

Diebus Lunæ & Martis.

Prima. Etymologiæ Philippicæ compendium, ordine inferiore traditum, hîc ita distribuitur: ut singulis mensibus recitando percurrere semel hanc partem hujus loci pueri possint. Interpretatio inferiore classe integrè percepta hîc reposcitur & memoriæ & libellis inscripta.

Valentinus Thebes.

Secunda. Bucolica Virgilii. Sex versus aut quotquot orationis *Κωίησις* seu contextus patitur, vernaculâ lingvâ redduntur: constructio vocum Grammatica monstratur: si quæ à propriâ significatione translata occurrunt, de iis breviter juniores monentur. Alternis lectiones, Grammaticæ repetitiones, itè recitationes, in diaria inquisitiones.

M. Martinus Möller.

Horis Pomeridianis.

Hora Duodecima privata pauperum exercitia in Scholâ.

Prima.

Prima. Terentii Comœdiæ proponuntur additâ vernaculâ interpretatione vocum, & phrasium distinctione. Alternis lectiones & Grammaticæ vocum singularum repetitiones, ad normam puerilium præceptionum, quæ huic ordini proponuntur. Phrasæ hîc propositæ in diaria referuntur & præceptoribus exhibentur.

Gregorius Sartorius Gorlic.

Secunda. Musicæ præceptiones & symphoniæ quotidianæ, Præcepta præcipua memoriæ mandantur, publicè recitantur.

Joachimus Sannovius.

Tertia. Libellus de civilitate morum scriptus ab Erasmo. Hîc partes orationis distinguuntur, quæ sint in unaquaq; consideranda, è libello etymologico docetur: significationes propriæ & translatae paucis, sicubi res postulat, traduntur. Alternis lectiones & Grammaticæ repetitiones: in quibus aliis horis, aliæ orationis partes per sua accidentia ducuntur: nominum ac verborum inflexiones exercentur.

M. Georgius Theodorus.

Diebus Mercurii & Veneris.

Prima. Syntaxeos Philippicæ compendium; regulæ prioribus plures, posterioribus pauciores proponuntur: exemplorum applicationes domi scriptæ ad præceptorem afferuntur: ut ab ocio domi avocentur pueri. Alternis lectiones & recitationes.

Valentinus Thebes.

Secunda. Elementa Profodiaca ex præscripto Dn. Meisteri. Hîc primùm usu magis, quàm ratione ad mensuram carminis assuefiunt pueri.

M. Martinus Möller.

Horis pomeridianis.

Hora *Duodecima* pauperes extra ordinem operarum publicarum, ad exercendam manum & cantum choralem in curiâ suâ conveniunt: regente operas inspectore, qui inspectionis suæ rationes reddit præceptoribus.

Prima. Epistolæ Ciceronis selectæ à Dn. Sturmio. Phrasæ è singulis lectionibus ad locupletanda diaria proponuntur Alternis lectiones, & Grammaticæ pro captu hujus ordinis repetitiones.

Gregorius Sartorius.

Secunda. Musicæ præceptiones & symphoniæ quotidianæ.

Joachimus Sannovius.

Tertia. Colloquia Ludovici Vivis. Decerpuntur inde vocabula

M

& ap-

CURRICULUM STUDIORUM

& appellationes rerum: Item phrasium loci communes pro captu hujus ordinis. Alternis lectiones & repetitiones.

M. Georgius Theodorus.

Die Jovis.

Horis matutinis.

Prima. Repetitio Paradigmatum è Donato. Item recitatio certi capituli è libello vocabulorum in decurias distributi.

Valentinus Thebes.

Secunda. Examen scriptorum breviusculorum, oratione solutâ, duorum, trium, quatuorvé membrorum, de phrasibus lectionum quotidianarum Ciceronis & Terentii in diariis hujus ordinis ex præscripto Dn. Sturmii.

Gregorius Sartorius.

Die Saturni.

Horis Matutinis.

Prima. Catechesis Trocedorfii.

Valentinus Thebes.

Secunda. Latinum Evangeliorum textum cum Grammaticâ vocum & phrasium enarratione proponit

Gregorius Sartorius.

Tertia. Figuras literarum Græcarum, quoad potest elegantissimè ducere atq; repræsentare & earum sonum plenè, ut decet, exprimere in Evangeliorum lectione hujus ordinis pueros docet

Johann. Major.

Ex hoc ordine ad superiorem afferunt pueri doctrinam catechetica, aliquam quatuor partium Grammatica cognitionem, literarum Græcarum vim & potestatem, musica & lectionis arithmetica principia, sylvulam phrasium è Cicerone & Terentio, initia quaedam exercitationum styli; vocabulorū ultra quatuor millia, è libello Scholæ nostræ cognitionē.

CLASSE QUARTA.

Diebus Lunæ & Martis.

Horis matutinis.

Prima. Nuda rerum vocabula in decurias distribuuntur ex præscripto Dn. Sturmii. Sequenti die à singulis reposcuntur. Quæstiones de no-

de nominum inflexionibus, ordinumq; distinctionibus assidue exercentur. Tituli vocabulorum integri repetuntur.

Gregorius Sartorius.

Secunda. Compendium etymologiæ Philippicum, quæstionibus distinctum: ut commodius priorum & posteriorum ratio haberi possit: qui eidem oneri ferundo non sunt pares.

Johann. Major.

Horis Pomeridianis.

Pauperes hora *Duodecima* ad sua exercitia conveniunt.

Prima. Sententiæ Ciceronis proponuntur, unius, duorum, triû, quatuor membrorum pro captu juniorum & auditorum. Themata nominum & verborum, communiore item phrasés adduntur, quas in diaria referre hujus ordinis pueri principio conantur ex præscripto Dn. Sturmii.

Johann. Major.

Secunda. Manum exercent pingendis literis hac horâ pueri: literarum linguæ vernaculæ & latinæ figuræ, ductus, lineamenta, metæ inter lineas parallelos vel sese continentes, vel ascendendo aut descendendo easdem excedentes, in tabulâ publicè monstrantur: scripta domestica inspiciuntur.

Valentinus Thebes.

Tertia. Sententiæ Salomonis & Grammaticæ repetitiones, themata & phrasés, pro captu hujus ordinis proponuntur.

Joach. Sannovius.

Diebus Mercurii ac Veneris.

Horis matutinis.

Prima. Vocabularum. Quæstiones pueriles declinationum.

Gregorius Sartorius.

Secunda. Compendium etymologiæ Philippicum. Alternis interpretationes & recitationes. Hic ut iterum ad domestica studia assuefiant pueri; nudam vocum interpretationem domi scribere, præceptori offerre, atq; ad sequentem ordinem salvam conservare jubentur.

Johann. Major.

Horis pomeridianis.

Hora *Duodecima* pauperes manum & cantum choralem exercent.

Prima. Sententiæ Ciceronis & phrasés ad instruenda diaria, ex præscripto Dn. Sturmii.

Johann. Major.

M ij

Secunda.

CURRICULUM STUDIORUM

Secunda. Examen exercitiorum, publicorum & privatorum in pingendis literis.
Valentinus Thebes.

Tertia. Disticha Catonis provectoribus, recentioribus lemma-
ta Dn, Sturmii Catoni adjecta proponuntur.

Jochimus Sannovius.

Die Jovis.

Horis Matutinis.

Prima. Examen generale præceptorum etymologiæ, quo singu-
lorum explorantur progressiones: atq; ad examen semestri in Scholâ
usitatum præparantur.

Paulus Gebhardus.

Secunda. Donati paradigmata pueris inculcantur propositis ex-
emplis, quibus pueriles de inflexionibus nominum & formationibus
temporum, regulæ in verbis declarantur: atq; ex præscripto Dn. Stur-
mii singulis diversa, tum nomina tum verba distribuuntur. Casibus
temporibus, modis, ut aliis horis omnibus in repetendo, adduntur in-
terpretationes linguâ vernaculâ: quæ principia quædam sunt: è quibus
tum latinæ, tum vernaculæ linguæ dextera atq; nativa interpretatio
promanat.

Johann. Major.

Die Saturni.

Horis Matutinis.

Prima. Catecheseos capita posterioribus simpliciter, prioribus
cum Lutheri exegefi proponuntur. Hic iisdem horis locum habent le-
ctiones & repetitiones.

Gregorius Sartorius.

Secunda. Donati paradigmata, exemplis nominum & verborum
exercerentur ex præscripto Dn. Sturmii.

Paulus Gebhardus Gorlic.

Horis pomeridianis.

Vespertinæ preces.

*Hicordo ad superiorem affert elementa doctrina catechetica lin-
guâ latinâ, Donati paradigmata omnia, communia etymologia capita,
apparatum verborum, quarundam phrasium & duo vocabulorum mil-
lia, semestri spacio assiduè à præceptoribus inculcata, exercitia manus ne-
cessaria.*

CLASSE

CLASSE QUINTA.

109

Diebus Lunæ, Martis, Mercurii, Veneris.

Horis Matutinis.

Prima. Recitatis prius precibus, & parte doctrinæ catechetiæ à Lutherò, operâ decurionum exercentur pueri triplici ordine: postremi in figuris literarum agnoscendis & discernendis: medii in syllabis jungendis: supremi in lectione. Has operas moderatur

Joach. Feurbachius Gorlic.

Secunda. Operam navant præceptori in iisdem pueris operâ decurionum exercendis pædagogi. Primos audit

Paulus Gebhardus.

Horis Pomeridianis.

Prima. Priores Donati paradigmata & nominum inflexiones tractant. Posteriores literarum figuris, syllabarum conjunctionibus, vocum pronunciatione sunt occupati, præsentibus pædagogis &

Paul. Gebhardo.

Secunda. Posteriores in discernendis literarum figuris, nec tendis syllabis, jungendis dictionibus, operâ decurionum exercent pædagogi. Priores literarum figuras pingere & formare eleganter docet, tabel-lâ publicè propositâ, & à singulis domestica scripta flagitat.

Gregorius Sartorius.

Tertia. Vocabula rerum homœoteleuta, quæ in quotidiano usu versantur & pueris nota esse debent, ex præscripto Dn. Sturmii proponit & reposcit

Valentinus Thebes.

Die Jovis.

Horis matutinis.

Prima. Capita doctrinæ catechetiæ junioribus linguâ vernaculâ simpliciter, grandiusculis cum exegefi Lutheri proponit

Johan. Major.

Secunda. Examen generale vocabulorum superioribus diebus propositorum. Hoc curat

Paul. Gebhardus.

Die Saturni.

Horis matutinis.

Prima. Elementa doctrinæ catechetiæ linguâ vernaculâ pueris

M iij

iterum

iterum inculcantur: prioribus cum exegeſi Lutheri: poſterioribus abſq̃
exegeſi. Curante
Paulo Gebhardo.

Secunda. Literarum formâ, pronunciatione, lectione pueri exer-
centur: initio factô, ut aliis horis omnibus, à capitibus ſimplicibus
doctrinæ catechetiçæ: quam ſequuntur libelli: qui continent nomina
& verborum inflexiones, etymologiæ & ſyntaxeos compendia, rerum
vocabula, Evangelia, Ex præceptis Sturmianis

Jochimus Feurbachius.

Horis Pomeridianis.

Preces Veſpertinae.

CLASSE SEXTA.

Diebus Lunæ, Martis, Mercurii, Veneris.

Horis matutinis.

Prima. Poſt precum & catecheſeos recitationem præceptor præ-
mum audit decuriones: qui cæteris expeditiis legunt: hi ſuas deinde
tantisper exercent decurias: dum ad præceptorem ſinguli ſuo ordine
vocantur. Hoc modo nulla decuria ocio ac deſidiâ horam exigit

Johann. Major.

Secunda. Audiuntur eadem decurionum operâ pueri, præſente
cum pædagogis

Joch. Feurbachio.

Horis Pomeridianis.

Prima. Audiuntur ordines duo poſteriores à pædagogis & decu-
rionibus. Priores in exercendâ manu regit præceptor: in autographa
domæſtica inquiri: literarum figuras, discrimina, ductus, connexio-
nes in tabulâ monſtrat: propoſitâ ſacrâ ſententiâ, & eâ quidem brevi
è Roſario Trocedorfii.

Jochimus Feurbach.

Secunda. Operas decurionum & pædagogorum in audiendis pue-
ris regit

Jochimus Feurbachius.

Tertia. Tota tribuitur appellationibus rerum notioribus diſtri-
buendis atq̃ exercendis ex præſcripto Dn. Sturmii.

Paul. Gebhardus.

Die Jovis.

Horis matutinis.

Prima.

Prima. Catechumeni exercentur: priores in exegeſi Lutheri, poſteriores in capitibus nudis.

Joachimus Feurbachius.

Secunda. Examen generale vocabulorum, ſuperioribus diebus propoſitorum.

Pædagogi.

Die Saturni.

Prima. Tribuitur recitationi doctrinæ catechetiæ & Exegeſi Lutheri.

Joachimus Feurbachius.

Secunda. Audiendis alphabetariis operam navant decuriones.

Pædagogi.

Horis Pomeridianis.

Preces Vespertinæ.

Hi duo poſtremi ordines ad proximum aſſerunt capita puerilia doctrinæ catechetiæ linguâ vernaculâ: expeditam lectionem, manus ad pingendas literas non proſus, rudem declinationum paradigmata, mille communium vocabulorum ſylvulam, ſententiarum aliquot breviſſimarum è Rosario Trocedorfii noticiam.

Hic hodie, Deo aſpirante, curſus eſt ſtudiorum Scholæ noſtræ: cujus ut ante annos quinquaginta hoc in loco propoſita ſunt iñitia: ita hunc uſq; in diem incrementa ſua haud obſcura habuit. Precamur Filium Dei, λόγον & Doctorem noſtrum: ut ipſe ſcholas noſtras doceat, regat, ſervet: ac vaſtitatem barbaricam, imminentem cervicibus noſtris, clementer ab his alveolis & myrmeciis avertat.

*Doctrina, pietatis, literarum & diſci-
plina puerilis curatores in Scholâ
Gorlic. 1616. menſ. Febr.*

F I N I S.

Errata.

E ij f. 1. v. 19. l. padagogorum. F ij f. 2. v. 8. lege excolendo. Ib. v. pen. l. elegantissimus. F iij f. 2. v. 9. l. hac. F iiij f. 1. v. 15. l. scelerum. Ibid. v. 22. l. emanare. fac. 2. v. 11. l. id solum quod adest. v. seq. l. accommodat. G ij f. 1. v. 17. l. hominem. H 1. f. 2. v. 10. l. careat. I ij f. 1. v. 18. & 19. l. σοφῶ.

Ad lectorem benevolum.

Συγγνώμην ἔχ' ἀναγνώσης: τὸν πλεῖστα ποιῶντα
δεῖ μὲν πολλὰ λαθεῖν. εἰμὶ βροτὸς: τί γε λάσ;
Erratis veniam da Lector: plurima agentem
Effugiunt quædam. Ringeris? errat homo.





Oberlausitzische Bibl. Görlitz



1005327 0



SLUB

Wir führen Wissen.

<http://digital.slub-dresden.de/id445597658/22>



GÖRLITZER SAMMLUNGEN
OBERLAUSITZISCHE BIBLIOTHEK